

清

史

稿

清史稿

列傳二百二十九

保甯

松筠

富俊

實心傳

清史稿

保甯圖伯特氏蒙古正白旗人靖逆將軍納穆札勒子乾隆中納穆札勒殉節回疆錫封三等公保甯山親軍襲爵授乾清門侍衛從征金川力戰迭克要隘將軍阿桂薦其才擢陝西興漢鎮總兵金川平繪像紫光閣御製贊褒其膽勇持重少年如宿將尋調河南南陽鎮直隸馬蘭鎮兼總管內務府大臣擢江南提督四十九年授成都將軍甘肅石峰堡回叛命選屯練番兵赴鞏昌安定助勦平之五十一年授四川總督保甯謹慎有操守盡心邊事邊夷上下孟董九子等寨生齒日繁請增設營員以屯練有勞績者拔補改修打箭爐城扼要築卡駐兵捍衛改梁黃大定白雞白鹿等八寨熟苗編入民戶並協機宜次年調伊犁將軍兼內大臣籌備倉儲疏言伊犁一年支糧十六萬六千餘石不敷二萬三千石歷就舊儲五十餘萬石內填補現贖三十餘萬石雖尙可數十餘年

之用地處極邊若不補籌餘糧偶遇歉收或有需糧之事慮難接濟請撥兵丁七百名增開七屯自來年耕種歲可收糧一萬九千餘石永遠備貯從之又奏添設惠遠城烏槍步甲四百名五十五年入覲途次命赴四川暫署總督事次年回任加太子少保授御前大臣惠遠城創立三十餘年戶口日繁於城東展築擴舊城四分之一伊犁無通曉俄羅斯語言者請於京師俄館選派一人來教習官兵子弟五年期滿試最優者充筆帖式俄屬烏梁海潛往哈屯河外汗山地方游牧帝慮其滋事命保甯察視疏言烏梁海居住甚安戢不必驅逐飭邊卡防範無庸添兵察哈爾兵丁及土爾扈特私竊哈薩克馬匹緝獲賞之法帝嘉保甯無偏袒得外藩心予議叙六十年召授吏部尚書兼鑲黃旗漢軍都統甫數月復出爲伊犁將軍嘉慶二年協辦大學士尋拜武英殿大學士加太子太保任邊事如故土爾扈特家奴三吉汚主母孀婦伯克木庫殞命特詔予伯克木庫旌表保甯疏陳駐防孀婦守節未舉旌表之典請照內地一體辦理於是採訪各城請旌者凡七十人後著爲令七年召還京授領侍衛內大臣管

理兵部兼管三庫八年因孝淑皇后山陵典禮會疏措詞不經褫銜鑄級留任保甯兩鎮伊犁歷十餘年西陲無事藩部悅服既去任朝廷遇邊疆興革每諮決焉十一年以疾乞休命在家食公爵全俸逾兩年卒賜金優卹諡文端祠祀伊犁子慶祥嗣爵殉回疆之難自有傳次子慶惠由廕生授侍衛歷官侍郎三以罪黜復起道光中官至熱河都統以疾歸卒諡勤僖

松筠字湘浦瑪拉特氏蒙古正藍旗人繙譯生員考授理藩院筆帖式充軍機章京能任事爲高宗所知累遷銀庫員外郎乾隆四十八年超擢內閣學士兼副都統五十年命往庫倫治俄羅斯貿易事先是俄屬布哩雅特人劫掠庫倫商貨俄官不依例交犯僅罰償流之遠地檄問未聽命詔停恰克圖貿易松筠至尋充辦事大臣閉關後邊禁嚴而不撓遇俄人皆開誠待之擢戶部侍郎俄羅斯以貿易久停有悔意撤舊官屢請開市未許卡倫兵出巡復爲布哩雅特人所殺松筠曰舊事未了又生旁支然亦了事之機也檄俄官縛送三人親訊於界上斬其二流其一請兩案併結詔斥專擅褫職仍留庫倫效力會西路土

爾扈特喇麻薩邁林者迷路入哈薩克歸携書信訛言俄人誘致土爾扈特謀亂下松筠察狀疏言俄羅斯實恭順無可疑俄人亦自陳證薩邁林書信出僞造詔實薩邁林於法許復開市五十七年召俄官會議定約親莅俄帳宴飲諭以恩信大悅服事歷八年然後定召還京授御前侍衛內務府大臣軍機大臣命護送英吉利貢使回廣東凡所要素皆嚴拒五十九年署吉林將軍尋命往荊州察稅務道出衛輝大水環城率守令開倉賑卹詔嘉獎授工部尙書兼都統充駐藏大臣撫番多惠政和珅用事松筠不爲屈遂久留邊地在藏凡五年嘉慶四年春召爲戶部尙書尋授陝甘總督加太子少保時教匪張漢潮及藍號白號諸黨擾陝甘松筠至駐漢中治糧餉給諸軍自軍興給陝西餽銀一千一百萬兩至是續撥一百五十萬設局清釐按旬咨部命陝諸將優劣密疏言明亮知兵而固實效恒瑞前戰湖北功最年近六旬精力大減慶成有勇無謀永保無謀無勇不能治兵並不能治民惟額勒登保德楞泰能辦賊仁宗深嘉納之明亮劾永保慶成避賊下松筠逮治永保亦與荊州將軍興肇許明亮誑

報軍功詔並褫職遣尙書那彥成赴陝會鞠會明亮已擊斃張漢潮松筠請緩其獄又請留撤拉爾回兵令慶成率以協剿帝不允旣而那彥成劾恒瑞棄藍號垂盡之賊折回陝西由松筠所誤詔褫松筠官銜侍衛仍留總督任川匪犯南鄭復分犯西鄉沔縣略陽松筠素謂匪多脅從可諭降欲單騎赴之副將韓嘉業固諫曰諭之不從而喪總督大損國威爲天下笑請先往嘉業果被害賊竄徽縣兩當五年春額勒登保那彥成會剿乃分路遁於是命長麟代爲陝甘總督授松筠伊犁將軍未之任暫署湖廣總督自請入覲面陳軍事先在陝上疏言賊不患不平而患在將平之時旣平之後請弛私鹽私鑄之禁俾餘匪散勇有所謀生帝以其言迂闊置之至京復以爲請忤旨降副都統銜充伊犁領隊大臣七年擢伊犁將軍乾隆中屢詔伊犁屯田皆以灌溉乏水未大興松筠力任其事預計安插官兵惠遠城需八萬畝惠甯城需四萬畝乃於伊犁河北引水開渠逶迤數十里又於城西北導水泉凡兩城有水之地皆開渠授田爲世業給穀種田器馬牛然旗人多驕逸或殺食所給牛馬田器棄不耕反覆曉

諭始聽命比去任凡墾田六萬四千畝當遠叛兵蒲大芳等譴戍塔爾巴哈台其黨馬友元等分成南路諸城十三年冬大芳復謀逆捕其黨五十餘人誅之次年檄調馬友元等百餘人赴伊犁種地悉斬於途詔斥未鞫而殺失政體降喀什噶爾參贊大臣復授陝甘總督調兩江總督南河自馬港口墊陷黃水倒漾淤連阻漕偕河督吳璥察勘海口請復故道製疏沙器具試之河口果驗又造撥船千艘改小運船親駐河干督趨渡黃回空皆迅速迭疏論河務宜引沁入衛可利漕運又謂吳璥於黃泥嘴俞家灘逢灣取直以致停淤爲璥等論駁復密陳吳璥徐端所論不實工程虛捏自請調任總河察其弊又薦蔣攸銑孫玉庭可任帝以松筠忠實治河非所長用攸銑爲河督責令相助爲理尋兼署河督事十六年調兩廣總督協辦大學士兼內大臣召爲吏部尙書十七年命往盛京會勘陵工兼籌移駐宗室事疏請小東門外建屋七十所居閒散宗室七十戶戶給田三十六畝又言西廠大凌河東有可耕地三千頃可移駐二千餘戶東廠周數百里地多積水其水自北山柳條邊來若相地開河可涸出沃

壤又東柳河溝亦多積水若自北山東橫開大渠可得沃壤數千頃續勘彰武
臺邊門外迤西牧廠開地橫三四十里縱六七十里並可移駐請於大凌河西
廠東界先試墾種詔並允行而試墾事爲將軍晉昌奏罷論者惜之回京授軍
機大臣未幾罷改授御前大臣十八年復出爲伊犁將軍拜東閣大學士改武
英殿大學士以平定滑縣教匪叙功加太子太保詔偕參贊長齡通籌新疆南
北諸城出納量減內地價運疏言北路塔爾巴哈台歲需內地銀四萬數千兩
南路回疆八城歲需內地銀五萬數千兩地方貢賦皆入經費之內無庸議減
伊犁歲需內地經費銀六十萬兩可撙節者無幾惟烏魯木齊爲新疆腹地歲
需銀一百一十餘萬兩宜裁減請復屯田廣墾蘆灘荒地開採銅鉛各礦抽收
迪化州土魯番木稅又議緣營糧餉凡倉儲充裕處改給銀米各半並復乾隆
四十六年以前捐監之例使邊地就近納粟所議或行或不行於內地歲輸卒
未大減喀什噶爾阿奇木伯克玉努斯聽其妻色奇納言多不法私與浩罕會
愛瑪爾交通愛瑪爾欲使尊爲汗遣使請自設哈子伯克用浩罕稅例徵安集

延商十九年松筠巡視回疆誅色奇納械王努斯禁錮伊犁拒浩罕之請斥去其使二十年喀什噶爾回人仔牙敦作亂親往治之仔牙敦就獲與布魯特比圖爾第邁莫特並寘極刑詔斥松筠不待命削宮銜召還京松筠初任時築四堡於伊犁河北議移置八旗散丁事未竟而去再至乃築室堡中堡置百戶戶授田三四十畝三時務農冬則肄武規畫粗備以屬代者而代者不置意田遂荒二十二年詔來年幸盛京抗疏諫阻罷大學士出爲察哈爾都統署綏遠城將軍踰年子熙昌歿帝憐之召還爲正白旗漢軍都統尋授禮部尙書調兵部復御前兼職未幾出爲盛京將軍松筠素以忠諫見重在朝時凡燕游贊御之事乘間直言無避既屢忤旨二十五年以兵部遺失行印追論降山海關副都統復以事迭降爲驍騎校是年秋仁宗崩於熱河梓宮回京宣宗步行於班寮中見之扶而哭翌日授副都御史擢左都御史其復起也甚負時望然卒不安於位未一月出爲熱河都統道光元年召授兵部尙書調吏部復爲軍機大臣二年暫署直隸總督以代改理藩院奏稿忤尙書禧恩被劾降六部員外郎尋

授光祿寺卿遷左都御史又出爲盛京將軍調吉林數年之中兩召還朝爲左都御史禮部尙書迭出署烏里雅蘇台將軍熱河都統直隸總督九年調兵部尙書往科布多鞠獄十年往山西按巡撫徐忻被控事回疆方用兵密疏有所論列詔令陳善後方略多被採納是年秋自以衰病請罷數日復請任使詔斥進退自由負優禮大臣之意又以前赴科布多屬道員徐寅代購什物罷職予三品頂戴休致至十二年浩罕遣使進表松筠曾言浩罕通商邊境可靖帝思其言復頭品頂戴署正黃旗漢軍副都統命赴歸化城勘達爾漢茂明安土默特三部爭地據乾隆朝圖記判定三部皆悅服還授理藩院侍郎調工部進正藍旗蒙古都統十四年以都統銜休致逾年卒年八十有二贈太子太保依尙書例賜卹諡文清祀伊犁名宦祠松筠廉直坦易脫略文法不隨時俯仰屢起屢蹶晚年益多挫折剛果不克如前實心爲國未嘗改也服膺宋儒亦喜談禪尤施惠貧民名滿海內要以治邊功最多子熙昌以廕生官主刑工兩部侍郎署熱河都統兼護軍統領數奉使赴各省按事亦被信用嘉慶二十三年卒於

長沙帝深惜之贈都統諡敬愼

富俊字松巖卓特氏蒙古正黃旗人繙譯進士授禮部主事歷郎中累遷內閣
蒙古侍讀學士內閣學士兼副都統嘉慶元年擢兵部侍郎充科布多參贊大
臣四年授烏魯木齊都統調喀什噶爾參贊大臣歷葉爾羌辦事大臣烏里雅
蘇台參贊大臣召署鎮紅旗漢軍都統兵部侍郎八年出爲吉林將軍調盛京
清治民典旗地限年首官不首者治罪追典價租息入官富俊疏言一年之內
一千六百餘案應追繳者不下萬人年久轉典株連繁多旗民多窮苦旣獲罪
又迫追呼情實可憫請悉寬免尤之十二年考覈軍政以潔己奉公邊陲安輯
特詔褒美予議叙十五年因採獲獲難受屬員蔽視職遣往吉林効力旣而言
官論關東三省賭博風熾仁宗念富俊在官時曾嚴禁即起授盛京工部侍郎
兼管奉天府尹及六邊邊門事務十八年授黑龍江將軍疏請內外臣工三年
更調及禁奢講武數事詔以更調非可限年餘並嘉納又以東三省官兵技藝
優嫻每屆五年挑送京營著爲令十九年調吉林將軍先是籌辦八旗生計詔

勘吉林荒地開墾移駐京旗將軍賽冲阿言拉林近地開荒可墾未有規畫富
俊至疏言乾隆中移駐京旗建屋墾地多藉吉林兵力墾而不種酌留數人教
耕一年後裁汰京旗蘇拉不能耕作始而雇覓流民久之田爲民有殊失國家
愛育旗人之意今籌試墾莫若先辦屯田請發吉林閒散旗人一千名爲屯丁
每丁給銀二十五兩籽種二石官置牛具人給荒地三十晌墾種二十晌留荒
十晌四年徵糧每晌一石十年後移駐京旗人給熟地十五晌荒五晌餘十晌
荒熟各半給原駐屯丁爲恒產免徵其租因利而利糜帑無多將來京旗移到
得種熟地與本處旗屯犬牙相錯學耕夥種實爲有益並詳列屯墾出納設官
經理事宜詔如議行二十年富俊親駐雙城子地在拉林河西北橫一百三十
里縱七十餘里沃衍宜耕遣員履丈分撥伐木於拉林河上游建立屯屋分五
屯設協領一佐領二分左右翼統治之即名屯地曰雙城堡於二十一年一律
開墾是年霜早歉收屯丁僅足餬口又挈妻子者不數居住間有逃亡乃展緩
徵糧一年添蓋窩棚借給籽種心始安二十二年調盛京疏陳雙城堡餘荒尙

多續發盛京吉林旗丁各千名往懇分左右二屯舊屯名爲中屯遂復調富俊吉林任其事二十四年先到屯丁千名盛京旗人多有親族偕來自願入屯惟隸當古塔者因近地亦可耕荒不願輕離鄉土聽其還以空額二百名改撥盛京二十五年復續到千名富俊巡歷三屯疏陳比屋環居安土樂業有井田遺風中屯開墾在先麥苗暢發男耕婦饁俱極勤勞仁宗大悅報曰滿洲故里佃田宅宅洵善事也續議三屯應增事宜詔嘉實心任事予議敘道光元年疏言三屯開墾九萬數千晌已著成效可移駐京旗三千戶請自道光四年始每歲移駐二百戶給資裝車馬分起送屯官給房屋牛具報可二年召授理藩院尙書與玉瀾堂十五老臣宴御製詩有勤勞三省不凋松柏之褒四年復出爲吉林將軍方雙城堡之興屯也富俊欲推其法於伯都訥圍場以旗戶往往賴幫丁助耕不如逕招民墾前後疏六七上爲廷議所格至是復言伯都訥圍場荒地二十餘萬晌募民屯墾較雙城堡費半功倍始允之五年丈地分屯申畫經界名曰新城屯分八旗爲兩翼每翼初立二十五屯後定爲十五屯每屯三十

戶以治本於農務滋稼穡八字爲號以次撥地同時並墾至七年陸續認佃三千六百戶總爲一百二十屯與雙城堡相爲表裏初議京旗每歲二百戶移駐雙城堡至六年僅陸續移到二百七十戶七年續移八十五戶而地利頓興自此雙城堡伯都訥兩地號邊方繁庶之區焉墾事既定復召爲理藩院尙書協辦大學士兼鑲黃旗漢軍都統次年京察以在吉林宣勞予議叙疏言京外競尙浮奢官民服飾及冠昏喪祭任意踰制有關風俗人心請依會典儀制刊布規條宣諭民間詔下有司議行時富俊年逾八年渥被優禮遇常朝免其入直迭讞獄盛京吉林俱稱旨十年調工部拜東閣大學士管理理藩院十二年復請禁僭用服色犯者拿捕詔斥徒滋擾累寢其議尋以天時亢旱自稱奉職無狀引年乞罷不許授內大臣疏言科舉保薦並認師生餽遺關通成爲陋習請嚴禁以端仕進詔嘉納申誠臣工務除積習十四年卒帝悼惜稱其清慎公勤克盡厥職贈太子太傅親臨奠醑諡文誠入祀賢良祠富俊尙廉節好禮賢士在吉林時請調黑龍江戍員馬瑞辰掌教白山書院且被嚴斥其治屯墾專任

資心傳卒以成功心傳山西人以進士官奉天寧海知縣坐東巡治御道有誤罷職富俊知其才辟佐墾務規畫悉出手定始終在事以勞復官世比諸陳潢之佐靳輔治河博啓圖一等誠嘉毅勇公明瑞孫嘉慶初襲爵授頭等侍衛歷兵部侍郎察哈爾都統道光七年調吉林將軍繼富俊之後守其成規治邊有法富俊請以屯墾專任之時京旗以邊地早寒又助耕乏人願往者少博啟圖疏請減戶增田許其買僕代耕統居中屯改建住屋俾便禦寒雖得請尋召授工部尙書兼領侍衛內大臣繼任者不果行其議故移駐卒未如額十四年卒贈太子太保諡敬僖

論曰保甯松筠富俊並出自藩族久膺邊寄晉綸扉稱名相伊犁吉林屯田利在百世然限於事勢收效未盡如所規畫甚矣締造之艱也松筠在吉林請開小綏芬屯墾當時以不急之務沮之至咸同間其地竟劃歸俄界苟早經營奚致輕棄實邊之計顧可忽哉

清史稿

列傳一百三十

書麟

弟周厚

覺羅吉慶

覺羅長麟

費淳

百齡

伯麟

書麟字執齋品佳氏滿洲鑲黃旗人大學士高晉子初授鑾儀衛整儀尉累遷冠軍使擢西安副都統乾隆三十八年大軍征金川命爲領隊大臣從參贊大臣豐昇額力戰轉先登克堅礮數十功最金川平加等議叙圖形紫光閣授廣西巡撫以父憂去起署兵部侍郎四十九年出爲安徽巡撫歲旱請留漕糧五萬石關稅銀三十五萬兩賑之阜陽有荒地六千餘頃疏請寬限清釐民間交易用官弓丈量以杜欺隱期於漸復舊額帝以書麟盡心民瘼予優叙黃連兩河漫溢帝因兩江總督李世傑未諳河工命書麟佐之與世傑及河督李奉翰議漫口有四惟司家莊湯家莊兩處分溜急興工堵築又奏桃園境內河流因順黃壩生有淤灘水勢紆折不暢於玉皇閣下挑引河俾黃流東注會清以資

宣洩五十二年擢兩江總督書麟素行清謹出巡屬邑輕騎減從民不擾累特
詔嘉之和珅柄政書麟與之忤未幾有高郵巡檢陳倚道揭報書吏假印重徵
事遣重臣鞠實坐書麟瞻徇下部嚴議又失察句容書吏侵用錢糧視職遣戍
伊犁尋起爲山西巡撫內閣學士尹壯圖論州縣虧空由於派累疆臣中惟李
世傑書麟獨善其身和珅尤忌之命壯圖赴各省清查倉庫自山西始壯圖因
獲譴五十六年仍授兩江總督兩淮鹽政巴爾阿交結商人坐書麟徇庇復奪
職予三等侍衛赴新疆効力嘉慶四年和珅敗召授吏部尙書兼正紅旗漢軍
都統加太子少保尋協辦大學士授閩浙總督弟廣興以首發和珅奸搆官既
得官多所彈擊書麟不善所爲嘗於帝前言之至是廣興以掌四川軍需獲咎
書麟請嚴治且自引罪詔宥之調雲貴鞫前督富綱得其貪婪狀論如律又按
問雲南巡撫江蘭諱灾得實覆江蘭職時猺夷不靖疏陳江蘭所奏不實辦理
草率帝嘉其公正遂親赴黃草壩督兵分路進剿擒賊首李文明等遣降猺入
甯招諭曉以利害夷衆五十二寨悔罪輸誠以土司苛派擾夷立牌申禁優詔

褒賚加太子太保五年調湖廣督師勦襄陽青藍黃三號教匪會長齡等已敗賊瓦房口書麟以東川保豐爲糧運要路親往截勦帝念其年逾七旬奔馳山谷間賊情詭詐戒毋冒險輕試六年由竹山房縣進勦徐天德禽斬甚衆疏言勦賊之法以固心民培民氣爲要撫輯得宜賊即是民任其失所民即是賊帝俞之川匪苟文明等由陝西平利越老林圍竄房縣偕長齡明亮進擊遇賊獅子崖大敗之復分兵伏余家溝高尖山天德等來襲却之疏請於襄陽添設提督移協鎮於鄖陽竹山二處天德等屯聚茅倫山令孫清元等分隊破之因病乞解職遣侍衛率御醫馳視未幾卒於軍帝深惜之贈太子太傅封一等男爵以子吉郎阿嗣諡文勤尋以倭什布治餽遲誤詔斥書麟知而不舉念其清廉公正治軍成勞獎醢恩禮仍有加焉第廣厚乾隆四十三年進士由工部主事歷御史出爲江西吉南贛甯道遷甘肅按察使嘉慶初偕總兵吉蘭泰擊教匪張映祥楊天柱於鞏昌秦州進躋諸白水江殲焉遷江西布政使調甘肅賊出沒於岷州禮縣間廣厚督兵由岷州遮羊鋪遏其衝保完善之地境內乂安調

廣東坐與總督那彥成游宴解職予三等侍衛爲庫車辦事大臣調哈喇沙爾官至安徽湖南巡撫卒

覺羅吉慶隸正白旗父萬福騎都尉官江甯將軍兼散秩大臣吉慶由官學生補內閣中書遷侍讀歷御史乾隆五十年嗣世職擢鑲白旗蒙古副都統累遷兵部侍郎命赴山東湖南湖北河南讞獄均稱旨調戶部五十六年出爲山東巡撫歲稔截留漕米三十萬石撥豫東軍船運米振飢調浙江閩海漁船赴浙洋剽掠吉慶於島嶼編保甲禁米出洋嚴緝代賣盜賊兼署提督獲海盜陳言等及臨海邪匪李鶴皋實之法鹽政岳謙執拗病民劾罷之遂兼鹽政嘉慶元年擢兩廣總督劾水師提督路超吉不勝任貶超吉秩二年廣西西隆亞稿寨苗匪勾結貴州狎苗竄踞八渡率提督彭承堯進剿克其要隘黔苗潛渡百藥窺泗城令副將德昌等分路攻撲毀苗砦十有九進攻亞稿至憂雄遇賊大敗之永豐百藥等苗目渡江降給酒食令回寨招撫亞稿山路陡峻選精卒由間道潛襲克其巢斬首千級以功加太子太保賜雙眼花翎亞稿之捷投誠者千

餘寨惟附近那地小河廣平蒙里等寨猶恃險抗拒會雲南兵至會勦盡克之賊首龍連登父子乞降粵境悉平六年命協辦大學士總督如故吉慶居官廉而察吏疏博羅縣重犯越獄司府循隱又通省賊罰銀按縣派徵爲臬司漏規事並上聞詔斥其因循陳爛展四省於博羅山中糾衆爲添弟會知府伊秉綬請發兵往捕吉慶爲提督孫全謀所蔽未許七年陳爛展四果剽掠作亂擾及數縣遣師擒斬之餘黨曾鬼六復勾結永安諸賊相繼起吉慶馳往勦捕請調江西兵二千爲助詔斥其張皇始疑之尋敗賊於義容墟曾清浩率衆四千餘人繳械降全謀禽賊渠薛文勝暨匪衆四百餘悉誅之事聞帝以吉慶奏報前後不符措置失當罷協辦大學士留總督任命那彥成往按吉慶復奏永安降匪多請留兵防範詔斥顓預結局解任聽勘巡撫瑚圖禮素與有隙既奉密諭詞察遂疏劾其疲輓不職那彥成猶未至獨鞠之據高坐設囚具隸卒故加詞辱吉慶恚曰某雖不肖曾備位政府不可受辱傷國體因自戕帝聞命那彥成陳狀尋以吉慶素廉潔治匪有功無故輕生詔免追論子壽喜仍襲世職坐事

黜以弟常喜嗣

覺羅長麟字牧庵隸正藍旗乾隆四十年進士授刑部主事貌奇偉明敏有口辯居曹有聲歷郎中出爲福建興泉永道累遷江蘇布政使五十一年召授刑部侍郎二年授山東巡撫責所屬濬河道修四十一州縣城工捕鉅野汶上劇盜田玉堂等寘之法詔嘉獎効萊州知府徐大榕治平度州民羅有良獄誤擬大榕訴於京刑部尙書胡季堂等往鞠不直長麟帝以防河有勞特寬之復以審擬濱州舉人薛對元罪失實褫職留修城工未幾授江蘇巡撫嘗私行市井問訪察民隱擒治強暴禁革奢俗清漕政斥貪吏爲時所稱五十七年調山西入覲時有市人董二誣告逆匪王倫潛匿山西某家和珅於宮門前言務坐以逆黨長麟至官訪悉其實董仇家故傾陷慨然曰吾髮垂白奈何滅人族以媚權相終反坐董二和珅大忤調浙江擢兩廣總督加太子少保整頓水師禽獲海盜六十年調署閩浙會將軍魁倫劾總督伍拉納巡撫浦霖貪縱並閩省庫藏虧絀事命長麟按治未得實詔切責乃奏婪索納賄狀伍拉納故和珅姻戚

帝疑長麟瞻徇並斥其平日沽名取巧奪職予副都統銜赴葉爾羌辦事尋授庫爾喀拉烏蘇領隊大臣調喀什噶爾參贊大臣奏減回子王公年班進京行李以恤驛站罷回民土貢有邊警請調兵堵勦詔以張皇斥之嘉慶四年授雲貴總督調閩浙五年調陝甘時教匪未靖勸民築堡團練令川陝豫楚交界處一體仿行募精壯難民入伍督師收伍金柱於唐家河又擊於傅家鎮將軍富成來援戰沒復偕固原提督慶成擊賊於沔陽乾溝河六年迭敗高天德馬學禮於鐵鎚川舊州鋪綱廠武關擒襄陽賊首馬應祥詔嘉獎尋以副將蕭福祿搜捕汧陽怕怕會匪濫殺邀功仁宗疑之調查得實斥長麟徇庇停其議叙又以傅家鎮之戰漫無籌措致富成陣亡七年召回京降署吏部侍郎遷禮部尚書兼都統復命督兩廣以母老留京八年授兵部尚書調刑部兼管戶部三庫十年兼翰林院掌院學士尋協辦大學士十三年命偕尚書戴衢亨察視南河長麟至清江浦聞安徽諸生包世臣習河事親訪之同視海口實不高仰用其說罷改道之議與衢亨通籌河工具得要領帝嘉之復偕衢亨清查兩淮鹽務

貢鹽政每年雜費悉報部駁銷以息浮議十五年以目告久在告特詔解職逾年卒諡文敏

費淳字爲浦浙江錢塘人乾隆二十八年進士授刑部主事歷郎中充軍機章京出爲江蘇常州知府父憂去服闋補山西太原撫冀寧道累遷雲南布政使有惠政以母老乞終養喪除起故官六十年擢安徽巡撫調江蘇嘉慶二年疏言淮徐揚三府屬被水窪地貴州縣勸植蘆葦以收地利應納錢糧卽照蘆課改折徵輸詔議行調福建復還江蘇四年擢兩江總督淳歷官廉謹爲帝所重兩淮鹽政徵瑞與淳爲姻家免其迴避時南河北歲漫溢淳以江督事繁自陳未諳河務乞免兼管允之命淳與總河詳議河務工程應行分辦事具聞帝密詢漕督蔣兆奎等優劣諭曰安民首在任賢除弊必先去貪汝操守雖優察吏過寬去一貪吏萬姓蒙福進一賢臣一方受惠其悉心訪問慎勿迎合朕意顛倒是非淳具以實聞有匿名訐告常州知府胡觀瀾者下詔按治疏糾觀瀾與江陰知縣楊世綬勒派累民得實請嚴譴詔斥不先劾以平日廉潔覆奏無徇

隱寬之尋劾鹽巡道彭翼蒙奢侈糜費褫翼蒙職復劾漕運總督富綱私受衛弁餽銀時富綱已調雲貴總督命吉慶嚴鞫實諸法漕運旗丁苦累屢議加徵調劑借漕督鐵保疏陳原徵隨漕項下有款可撥以裨運丁又旗丁月米令州縣改給折色應領運費責糧道放給以免層層剝削如所請行五年邵家壩河工合龍加太子少保六年以足疾乞歸醫治允之命母解職尋稱足疾已瘳若遵旨回籍轉涉欺蒙詔嘉其得大臣體賜內府藥餌七年宿州土匪王潮名糾衆戕官檄鎮將勦捕事定請於宿之南平集設撫民同知裁甯國府同知移駐其地並調設營汛從之八年召授兵部尙書時河決河南衡家樓橫溢張秋以南由鹽河入海有妨漕運命淳往勘治於張秋西岸加寬裏頭東岸加高長堤以防溜勢北掣南口趁汶水北注之勢引歸河身北口自大溜迤北分導餘流以資挽運並仿南河刷沙法製混江龍鐵籠船以疏淤明年糧運過張秋無阻降詔褒賚調吏部尙書協辦大學士十一年偕尙書長麟按問直隸藩司書吏侵冒錢糧獄鞫實論如律十二年拜體仁閣大學士管理工部兼管戶部三庫

十四年以庫銀被竊鑄秩留任已復坐失察工部書吏冒領三庫銀詔切責削
宮銜左遷侍郎調兵部逾年復授工部尚書十六年卒復大學士諡文恪祀雲
南名宦

百齡字菊溪張氏漢軍正黃旗人乾隆三十七年進士選庶吉士授編修掌院
阿桂重之曰公輔器也督山西學政改御史歷奉天順天府丞百齡負才自守
不干進邇邇開職十餘年仁宗親政後始加拔擢嘉慶五年出爲湖南按察使
調浙江歷貴州雲南布政使八年擢廣西巡撫武緣縣有冤獄諸生黃萬鏐等
爲知縣孫廷標誣擬大牌百齡下車劾廷標逮問帝嘉之賜花翎洎定讞特加
太子少保十年調廣東南海番禺兩縣蠹役私設班館羈留無辜爲民害重懲
之効能縱容之知縣王軾趙興嚴申禁令詔予優叙尋擢湖廣總督兩湖多盜
下令禽捕行以便宜江湖晏然未幾王軾計百齡在粵用非刑斃命迨勒供應
臨行川運夫二千餘名總督那彥成疏劾並及到湖北後截留廣東會奏批摺
命吳熊光等按鞫議褫職遣戍帝原之命効力實錄館尋予六品頂戴赴福建

治糧餉事竣授汀漳龍道擢湖南按察使調江蘇以病歸病痊授鴻臚寺卿歷山東按察使就擢巡撫十四年擢兩廣總督粵洋久不靖巨寇張保挾衆數萬勢甚張齡百至撤沿海商船改鹽運由陸禁銷賊接濟水米諸弊籌餉練水師懲貪去懦水師提督孫全謀失機劾逮治罪每一檄下耳目震新巡哨周嚴遇盜輒擊之沈海羣魁奪氣始有投誠意張保妻鄭尤點悍遣朱爾廣額溫承志往諭以利害遂勸保障要制府親臨乃聽命百齡曰粵人苦盜久矣不坦懷待之海氛何由息遂單舸出虎門從者十數人保率艦數百轟礮如雷環船跪迓立撫其衆許奏乞貸死旬日解散二萬餘人繳礮船四百餘號復令誘烏石二至雷州斬之釋其餘黨粵洋肅清帝愈嘉異之復太子少保賜雙眼花翎子輕車都尉世職十六年再乞病回京授刑部尙書改左都御史兼都統未幾授兩江總督時河決王家營上游繇山拐李家樓並漫溢論者謂河患在雲梯關海口不暢多主改由馬港新河入海百齡親勘下游疏言海口無高仰形迹亦無攔門沙隄其受病在上年挑河二段內積淤三千餘丈又親至馬港口以下見

淤沙挑費更鉅入海路窄二者相較仍以修濬正河爲便並請加挑甕工尾以下河身兩岸接築新隄於七套增建減水壩修復王營減壩重建磨盤埭詔如議百齡年逾六旬始生子值帝萬壽日聞之賜名扎拉芬以示寵異勉其盡心治河次年春諸工先後竣漕運渡黃較早迭加優賚賜其子六品廕生洪湖連年水漲五壩壞其四詔責急修百齡以禮壩之決由於河督陳鳳翔急開運閉以致棘手奏劾之鳳翔被嚴譴訴道廳請開禮壩時百齡同批允又許淮陽道朱爾宸額爲百齡所倚司葦蕩營有弊言官吳雲馬履泰並論其舉劾失當命松筠初彭齡往按帝意方嚮用議上專坐朱爾宸額罪以塞衆謗十八年命協辦大學士總督如故十九年初彭齡奉命赴江蘇同查虧帑議不合彭齡爲所掣患甚遂劾百齡受鹽場稅關餽遺按之未得實彭齡坐誣被譴會鹽運使廖寅捕逆犯劉第五部鞠爲僞百齡亦坐失入覲宮銜罷協辦大學士江南莠民散布逆詞連及百齡嚴詔責捕二十年獲首從方榮升等百五十人並抵法復宮銜封三等男爵兼署安徽巡撫是年冬病甚命松筠往代卒於江甯帝聞悼

惜詔復協辦大學士遣侍衛賜奠許極入城治喪將遣皇子奠醑既而以江北災民未能撫卹停其奠醑仍賜祭葬如例諡文敏子扎拉芬襲男爵

伯麟字玉亭瑚錫哈哩氏滿洲正黃旗人由繙譯舉人授兵部筆帖式擢右春坊右贊善累遷內閣學士乾隆五十七年授盛京兵部侍郎尋授山西巡撫九年擢雲貴總督十年緬甸與暹羅屬夷戛于臘構釁求助於孟連土司刀派功援往遇害失其印伯麟以刀派功禍由自取惟責暹羅繳所得印十一年緬甸請豫期納貢伯麟知其與暹羅構兵爲求助地却之後緬甸爲戛于臘所敗果來乞援伯麟拒勿應戛于臘旋亦敗走緬兵次車里土司界嚴兵守邊移檄訓戒緬兵遂退迤南江外獮匪入邊劫掠遣普洱鎮總兵那林泰勦平之十三年緬甸四大萬頭目來請十三板納地伯麟責其冒昧諭以十三板納爲九江土司所轄俱屬內地毋生覬覦詔嘉其得體十四年入覲賜花翎十七年騰越邊外野寨頭目拉幹出擾遣兵禽之緬竊騰越要隘舊設土練一千六百名久廢規復其制給曠土耕種僧銅金從獮夷李文明爲亂已悔罪投誠更姓名爲張

輔國充南興土目至是復勾結猺衆侵擾伯麟赴緬甯督土司會剿十八年正月進逼南興破其巢輔國就戮邊境肅清增設騰越鎮馬鹿塘大壩二汛二十二年臨安邊外夷人高羅衣自稱窩泥王僞署官職糾衆萬餘攻殺土目龍定國擾瓦渣溪處兩土司境渡江窺伺內地伯麟親往勦平之議定善後條規使各土司綏靖夷民以安反側叙功加太子少保尋命協辦大學士仍留總督任二十三年羅衣從姪高老五竄藤條江外復爲亂擾及郡城督師勦禽之餘黨悉殲增設臨安江內東西兩路要隘塘汛官兵以江外煙瘴最盛降夷就撫裁撤留防兵練二十五年召授兵部尙書兼都統復疏陳滇黔邊務六事如議行道光元年拜體仁閣大學士管理兵部尋以年老休致仍充實錄館總裁三年萬壽節與十五老臣宴逾年卒諡文慎伯麟任邊圻凡十六年廉潔愛民士林尤感戴之還朝後以旗人生計爲憂疏陳調劑事宜深中利弊論者謂有名臣風

論曰仁宗倚畀疆臣膺重寄者多參揆席書麟吉慶並勤勞軍事而盡瘁辱身

有幸不幸焉長麟費淳先後治吳一嚴一寬才德互有優絀百齡號能臣之冠
機牙鋒銳凌轢一時晚節乃招物議如伯麟之安邊坐鎮遺愛不涇臧量豈易
及哉

清史稿

列傳一百三十一

勒保

額勒登保

新附

德楞泰

勒保字宜軒費莫氏滿洲鑲紅旗人大學士溫福子由中書科筆帖式充軍機章京乾隆三十四年出爲歸化城理事同知坐事當褫職高宗以溫福方征金川特原之授兵部主事仍直軍機處累遷郎中出爲江西贛南道調安徽廬鳳道以母憂去官命爲庫倫辦事章京四十五年充辦事大臣累擢兵部侍郎仍留庫倫五十年內召未幾授山西巡撫五十二年署陝甘總督尋實授五十六年大軍征廓爾喀治西路駝馬裝糧臺站加太子太保初安徽奸民劉松以習混元教戍甘肅復倡白蓮教與其黨湖北樊學明齊林陝西韓龍四川謝添緒等謀不軌五十九年勒保捕劉松誅之而松黨劉之協宋之清傳教於河南安徽以鹿邑王氏子曰發生者詭明裔朱姓煽動愚民事覺被捕詔誅首惡赦餘黨發生以童幼免死戍新疆之協遠關不獲各省大索官吏奉行不善頗爲民

擾武昌府同知常丹葵在荊州宜昌株連數千人川楚民方以苗事困軍興無賴者又因禁私鹽私鑄失業益仇官亂機四伏矣六十年勒保調雲貴總督湖南貴州苗疆不靖福康安督師進討勒保赴軍安撫正大銅仁鎮遠降苗並治軍需雲南威遠猓匪擾邊勒保將赴勦會猓匪即平福康安和琳相繼卒於軍命偕明亮鄂輝接辦軍務未至而湖北教匪熾蔓延川陝林之華覃加耀踞長陽黃柏山福甯攻之不克勒保往會剿嘉慶二年春連戰敗之方乘勝薄其巢而貴州南籠狆苗王囊仙等叛詔勒保督師討之王囊仙者洞灑寨苗婦當丈寨韋七緒鬚以囊仙有幻術推爲首分遣其黨大王公李阿六王抱羊圍南籠府及府屬之永豐黃草壩捧鮮新城册亨安順府屬之永甯歸化諸城册亨陷滇黔道梗三月勒保至令總兵德英額札耶阿袁敏分守東西北三路其南際滇粵咨兩廣總督吉慶雲南巡撫江蘭防之自率按察使常明副將施紹進克關嶺抵永甯副將巴圖什里已解其圍都司周廷翰援歸化圍亦解會提督珠隆阿擊永豐自率總兵張玉龍七格解新城圍進至南籠聞始解詔嘉南籠固

守賜名興義道常明施縉解黃草壩圍賊悉衆圍捧鮮永豐益急分兵援之先解捧鮮圍自率常明施縉攻洞灘營丈賊果賊縱火自焚都司王宏信千總洪保冒烈燄入禽王囊仙韋七縉縉旋解永豐圍吉慶亦自廣西至復冊亨六月狎苗平詔改永豐曰貞豐錫封勒保一等侯爵號曰威勤九月調湖廣總督時川楚賊氛愈熾立青黃藍白線等號又設掌櫃元帥先鋒總兵等偽稱先命永保總統諸軍易以惠齡又易以宜縣皆不辦至是宜縣薦勒保以自代允之三年正月至四川梁山賊曾柳起石壩山而白號王三槐青號徐天德藍號林亮工諸賊聚開縣勒保先破石壩山斬曾柳詔嘉爲入川第一功調授四川總督三槐走達州與藍號冉文儔合惟亮工仍在開縣之開州坪勒保令副都統六十七總兵富森布剿之親追三槐九戰皆捷賊走巴州掠閬中蒼溪而西追之急復東入儀隴勒保以賊蹤靡定所至裹脅乃畫堅壁清野策令民依山險聚寨屯糧團練鄉勇自衛賊由儀隴趨孫家梁欲與白號羅其清合偕惠齡恒瑞截剿三槐南竄渠縣文儔遁入其清寨勒保留惠齡恒瑞剿孫家梁仍親臨三

槐五月三槐犯大竹分竄梁山墊江新甯東奔開縣亮工出爲犄角擊走之斬其黨林定相天德來接敗之禽其黨張洪鈞天德奔新甯三槐與冷天祿踞雲陽安樂坪進圍之七月誘三槐降禽之械送京師詔晉封公爵天祿盡有三槐之衆負隅抗拒圍攻久不下黃號龍紹周興建樊人傑來援擊却之十月天祿糧盡詭請降夜突營大爲所挫尋走新甯四年正月天德爲額勒登保所敗亦竄新甯仁市塢與黃號王光祖合偕額勒登保夾擊天德走墊江天祿走忠州勒保令額勒登保截擊天德總兵百祥追天祿自率大軍策應仁宗以前此諸軍事權不一特授勒保經略大臣節制川楚陝甘豫五省軍務明亮額勒登保爲參贊勒保以賊勢重在四川請暫駐梁山大竹等處督師尋破天德天祿分竄隣水長壽復敗之天祿爲額勒登保所殲二月移駐達州疏言聚寨團練行之四川有效請通行於湖北陝西河南又言安民即以散賊請各省被賊之區蠲免今歲應徵錢糧並如議行四月追剿天德紹周建人傑及張子聰等賊遁開縣東鄉旋分竄竹谿關渡口場意圖入陝五月子聰勾合黨號冉天元北竄

道額勒登保兜擊逼回川境子聰竄通江藍號包正洪竄雲陽青號王登廷竄東鄉天德紹周建人傑及線號龔文玉白號張天倫竄大甯老林勒保檄調諸軍分剿六月總兵朱射斗殲正洪於雲陽七月德楞泰禽文玉於大甯八月提督七十五禽建人傑於開縣賊勢寢衰矣會治饒大臣福甯勦勒保月饒十二萬兩視他路爲多所辦賊有增無減而天德復由大甯闖入湖北境總督倭什布飛章告警詔褫職命尙書魁倫赴川勘問以額勒登保代爲經略勒保能得軍心而入旗兵素驕稍裁抑之遂騰蜚語及就逮所部將士爲之訟冤魁倫窺帝怒不測未以上聞稍爲申辨糜餽縱賊罪卒坐以明亮恒瑞不聽調度副都統訥音布兵譁閔不據實參奏又賊犯楚境不即馳報玩視軍務論大辟帝念前功改爲斬候解部監禁五年春額勒登保等勦賊陝西魁倫專任川事而將士不用命天元子聰合黃號徐萬富青號汪瀛線號陳得俸渡嘉陵江魁倫退守潼河事聞起勒保赴川三月至賊已越潼河赴中江截勦連敗之詔逮魁倫授勒保四川提督兼署總督時德楞泰已大破賊於馬蹄岡冉天元陳得俸雷

世旺先後殄滅合勦汪瀛於嘉陵江口禽之四月擊敗高天升馬學禮賊遁甘肅番境五月復犯龍安罷提督專任總督六月賊北走甘肅遣副都統阿哈保追之自率兵勦川東川北諸賊七月與德楞泰合擊白號苟文明鮮大川於岳池新場敗之大川走死實授總督八月白號賊與青號趙麻花合進擊殲其黨湯思舉麻花復合王珊向陝境欲迎天德入川勒保截之於江口斃麻花珊亦爲德楞泰所誅十二月藍號李彬白號楊開第黃號齊開謨自巴州竄儀隴德楞泰擊斃開謨勒保亦斬開第獨彬遁走六年正月移師川東敗藍號楊步青於大甯而樊人傑徐萬富合藍號王士虎冉天士擾廣元蒼溪遣阿哈保往援賊僞向儀隴陰沿嘉陵江南下欲潛渡馳至南部與阿哈保合擊殲萬富二月藍號張士龍竄巴州遣七十五擊斬之自擊藍號陳朝觀白號魏學盛敗之巫山雲陽間賊北竄入陝楚界追至竹山六月賊回竄東鄉擊敗之禽青號何子魁殲藍號苟文通鮮倭先七月又禽徐天壽王登高八月白號高見奇合魏學盛竄廣元邀擊之追至通江適藍號冉學勝自老林至與合乘夜攻之禽學勝

詔封三等男九月見奇學盛分竄南江及陝西西鄉勒保抵南江聞李彬方掠巴州蒼溪恐踰嘉陵江亟往賊已東竄通江乃移兵大竹勦湯思蛟劉朝選追至太平禽其黨蕭焜是冬偕額勒登保德楞泰疏言勦匪大局已定請酌撤官兵詔以巨賊未盡除遽思將就了事嚴斥之七年正月復疏言川省自築寨練團賊勢十去其九擬分段駐兵率團協力搜捕餘匪遣熟諳軍事之道府正佐各員分專責成兵力所不到民力助之民力所不支兵力助之庶賊無所匿詔如議行是月禽青號何贊於忠州二月李彬竄南江爲建昌道劉清所禽三月張天倫魏學盛擾川北遣總兵田朝貴往勦不利親率羅思舉等繼進大敗賊於巴州天倫學盛並就殲五月遣羅聲皋達斯呼勒岱勦禽白號度向瑤總兵張結勦青號禽徐天培田朝貴勦藍號殲楊步青七月劉朝選糾青藍黃號殘匪竄大甯勒保遣將擊之羅思舉禽朝選達斯呼勒岱殲賴飛隴詔晉一等男十月羅思舉禽張簡而湯思蛟敗竄亦就獲十一月思舉禽黃號唐明萬時川中著名逆首率就禽殲餘匪竄老林不復成股在陝楚者亦多爲額勒登保德

楊泰所殲十二月合疏馳奏成功晉封一等伯爵仍以威勳爲號八月搜捕餘匪禽白號苟文富宋國品張順青號上青招降黃號王國賢偕顧勒登保德楞泰會奏肅清未幾陝西南山餘孽復起至九年八月始平十年入覲詔曰自嘉慶三年勒保在川省令鄉民分結寨落匪始無由焚劫且助官軍擊賊其後陝楚仿行賊勢乃促今三省閭閻安堵實得力此策爲多加太子太保雙眼花翎回鎮四川與民休息時解散鄉勇令入伍爲兵十一年秋陝西甯遠鎮新兵倡亂遣總兵唐文淑往援勦叛將蒲大芳縛首逆乞降德楞泰受之勒保奏勦叛兵罪重於逆匪率以納降不知畏威安能悔罪他兵從而生心益驕難制帝聽其言命赴陝西會治善後事宜尋聞四川綏定新兵亦叛桂涌捕禽首逆磔之餘黨並論如律十三年涼山夷匪擾馬邊廳勦平之十四年拜武英殿大學士仍留總督任十五年召來京供職坐在四川隱匿名揭帖未奏降授工部尙書調刑部十六年出爲兩江總督尋內召復授武英殿大學士管理吏部改兵部授領侍衛內大臣十八年充軍機大臣兼管理藩院十九年以病乞休食威勳

伯全俸二十四年卒詔贈一等侯諡文襄勒保短小精悍多智數知其父金川之役以剛愎敗一反所爲寄心脅於諸將帥優禮寮屬俾各盡其長卒成大功晚入閣益斂鋒芒結同朝之歡而內分涇渭旣罷相帝眷注不衰命皇四子端親王娶其女以恩禮終子九長英惠科布多參贊大臣襲三等威勤侯卒孫文厚嗣爵第四子英綬工部侍郎孫文俊江西巡撫

額勒登保字珠軒瓜爾佳氏滿洲正黃旗人世爲吉林珠戶隸打牲總管乾隆中以馬甲從征緬甸大小金川累擢三等侍衛賜號和隆阿巴圖魯乾清門行走四十九年勦甘肅石峯堡回匪五十二年平臺灣疊遷御前侍衛五十六年從福康安征廓爾喀擢駐藏大臣攻克擦木賊寨七戰七勝抵帕古朗河班師殿後加副都統銜諭臺灣廓爾喀功兩次圖形紫光閣尋授副都統兼護軍統領擢都統六十年貴州松桃苗石柳鄧湖南永綏苗石三保相繼叛陷乾州福康安視師請額勒登保偕護軍統領德楞泰率巴圖魯侍衛赴軍至則松桃圍已解石柳鄧逸入石三保黃瓜寨中額勒登保由松桃進攻解永綏圍克黃瓜

寨攻賊首吳牛生於蘇麻寨克西梁牛生遁高多寨禽之授內大臣又獲乾州賊目吳八月餘黨據平隴進抵長吉山敗之嘉慶元年福康安卒和琳代時石三保就禽石柳鄧在平隴乃進兵復乾州賜花翎署領侍衛內大臣秋和琳卒於軍統兵者惟額勒登保德楞泰及湖南巡撫姜晟三人詔將軍明亮提督鄂輝往會勦十月克平隴石柳鄧遁踞養牛塘山梁分兵克之十二月斬石柳鄧苗縛吳八月子廷義以獻軍事告竣詔嘉其功最錫封威勇侯賜雙眼花翎二年移師勦湖北教匪時林之華覃加耀踞長陽黃柏山地險糧足總督福甯攻之久不下三月額勒登保至克四方羣賊遁鶴峯芭葉山其險隘曰大壩口六月克之賊竄宣恩建始分兵三路進十月斃之華於大茅田而加耀遁施南山中尋竄長樂朱里寨三面懸崖惟東南一徑十二月遣死士縋登掘地窖火藥轟之賊爭走墜崖坑谷皆滿惟加耀偕賊二百遁踞歸州終報寨詔斥額勒登保縱賊降三等伯爵三年春加耀始就禽仍以戡事緩奪爵職花翎予副都統銜命赴陝西協勦襄匪高均德姚之富齊王氏等會李全自盤屋至藍田欲與

諸賊合擊走之姚之富齊王氏失援遂爲明亮德楞泰所殲進剿均德於兩岔河賊分竄商州鎮安四月赴荊州會剿張漢潮敗之竹山逼山陝西入四川九月擊漢潮於廣元禽其子正潞與德楞泰等合剿川匪羅其清其清踞營山之箕山已爲德楞泰所破竄大鵬寨額勒登保與德楞泰惠齡恒瑞四路進攻十月合圍其清突走青觀山樹柵距險額勒登保鑒於黃柏山芭葉山頓兵之失議主急攻親逼柵前席地坐令楊遇春督兵囊土立營且戰且築諸軍繼之攻擊七晝夜賊不支竄渡巴河踞遂風寨廢堡德楞泰同至岡之數重勢垂克薄暮忽傳令撤圍賊傾巢夜潰遲至黎明始馳追賊四路逃竄至方山坪已散盡獲其清於石穴逸匪數日內並爲民兵禽獻是役賊趨絕地無外援開網縱之饑疲就縛士卒不損竟全功焉復花翎十二月追徐天德冷天祿於合州四年春詔以勒保爲經略大臣額勒登保與明亮同授副都統爲參贊三月追冷天祿於大竹聞蕭占國張長庚山崗州竄營山回軍迎擊賊踞黃土坪臨江負山令總兵朱射斗繞山難猴寨截其西自率楊遇春由東襲攻城隍廟賊西走

爲射斗所扼夾擊殲其半越山竄走尙數千乘夜圍擊於譚家山隕厓死及生禽幾盡斬占國長庚有冒難民逃出者投冷天祿述兵威天祿曰我曾於安樂坪破經略兵數萬何懼此乎時踞岳池距大軍不遠天祿遣大隊先行自率悍黨八百殿後額勒登保冒雨由間道進至廣安令穆克登布據人頭壩以待楊遇春潛出賊後自將索倫勁騎衝之賊死鬪天祿斃於箭次日迫其大隊於石筍河斬溺過半先渡者追殲之旬日間連殄三劇賊疊詔嘉寶先封二等男爵晉一等四月追勦白號張子聰于雲陽子聰糾合黃號樊人傑線號蕭焜卜三聘等叠敗之寒水壩賊稍散五月子聰復合冉天元窺陝境扼禦之子聰竄通江追敗之於苟家坪又敗天元於木老壩七月天元竄鎮龍關欲與王登廷合登廷屯馬鞍寨擊走之窮追至大竹東鄉援賊膺至分兵進擊禽斬甚衆仍蹣登廷額勒登保戰績爲諸軍最湖北道員胡齊崙治餉餽送諸將事發獨無所受詔嘉其忠勇公清爲東三省人傑八月勒保以罪逮命代爲經略授領侍衛內大臣補都統疏陳軍事曰臣前數年止領一路偏師今任經略當籌全局教

匪本屬編氓宜招撫以散其衆然必能勦而後可撫必能堵而後可勦從前湖北教匪多曾從少四川教匪少曾從多今楚賊盡逼入川其與川東巫山大甯接壤者有界嶺可扼是湖北重在堵而不在勦川陝交界自廣元至太平千餘里隨處可通陝攻急則入川川攻急則入陝是漢江南北勦堵並重川東川北有嘉陵江以限其西南餘皆崇山峻嶺居民近皆扼險築寨團練守禦而川北形勢更便於川東若能驅各路之賊逼川北必可聚而殲旂是四川重在勦而不在堵但使所至堡寨羅布兵隨其後遇賊迎截夾擊以堵爲勦事半功倍此則三省所同臣已行知陝楚曉諭修築並定賞格以期兵民同心殲賊至從征官兵日行百十里旬月尙可耐勞若閱四五年之久騾馬尙且踣斃何況於人續調新募者不習勞苦更不如舊兵臣一軍尙能得力者以兵士所到之處亦臣所到之處兵士不得食息臣亦不得食息自將弁以及士卒無不一心一力而各路不能盡然近日不得已將臣兵與各提鎮互相更調以期人人精銳又言軍中出力人員應隨時鼓勵令各路領兵大員自行保奏以免咨送遲延帝

並驢之時徐天德敗於湖北折回川東漸衰弱而王登廷與冉天元苟文明合阮正澆竄廣元賊勢重在川北九月率楊遇春殲正澆於雲霧山十一月登廷天德天元及樊人傑會合抗拒疊戰於巴州何家垓東君壩禽賊目賈正舉王國安追至蒼溪貓兒壩額勒登保以天元善戰令楊遇春穆克登布合左右翼力擊穆克登布輕進爲天元所乘傷亡甚衆賊萃攻經略中營血戰竟夜賊始退次日登廷在南江爲鄉團所禽額勒登保以實聞詔嘉其不諱敗不攘功不媿大臣天元竄開縣額勒登保病留太平遣楊遇春穆克登布追之將與德楞泰夾擊而楊開甲辛聰王廷詔高天升馬學禮諸賊以川北守禦嚴無所掠乘間由老林竄陝西城固南鄭提督王文雄不能禦前路賊且入甘肅額勒登保疏請以川事付魁倫德楞泰自力疾赴陝而德楞泰先已西行赴援不及回軍五年春天元糾脅日衆乘魁倫初受事遂奪渡嘉陵江朱射斗戰死未幾潼河復失守川中震動詔逮魁倫起勒保與德楞泰同辦川賊責額勒登保與那彥成專勦陝賊時那彥成破南山餘賊於隴山伏羌德楞泰追王廷詔楊開甲於

成縣額勒登保亦至乃令德楞泰回川西自與那彥成分三路遏賊入川及北竄之路楊遇春穆克登布破張天倫於岷州慶成等破張世龍於洮河廷詔開甲合犯大營擊走之分兵追賊大軍移勦高天升馬學禮迭敗之賊踰渭北竄尋要之於鞏昌又要廷詔開甲於岷州諸賊並逼回渭南而張世龍等走秦州將越北棧留那彥成追高馬二賊自率楊遇春岱森保回陝令王文雄及總兵索費英阿等分扼南北棧張漢潮已爲明亮所殲餘黨留陝者糾合復衆張世龍張天倫爲大兵所驅竄滇安皆注漢北山中東向商維賊復蔓延嚴詔詰責召那彥成回京閏四月額勒登保率楊遇春連敗賊於商維兩岔河令遇春扼龍駒寨使不得犯河南賊乃回竄留後隊綴官軍連破之洵陽大小中溪設伏溪口禽斬三千餘斃藍號劉允恭劉開玉於是漢潮餘黨略盡晉封三等子楊開甲辛聰張世龍張天倫伍金柱戴仕傑等皆西竄五月令楊遇春等追擊金柱等於漢陰手扳厓陣斃賊目龐洪勝等進攻楊開甲等於洋縣茅坪賊踞山巔誘之出戰伏兵繞賊後夾擊陣斬開甲六月賊竄甘肅徽縣兩當藍號陳傑

偷越棧道禽之八月遇春斬伍金柱於成縣斃宋麻子於兩當賊復回竄陝境疏陳軍事略謂賊蹤飄忽時分時合隨殺隨增東西回竄官軍受其牽綴稍不愼即墮術中堵剿均無速效自請治罪又言地廣兵單請將防兵悉爲勦兵防堵責鄉勇促築陝楚寨堡以絕擄掠溫詔慰勞以勦捕責諸將防堵責疆吏分專其任會賊逼武關截擊走之六年春奏設甯陝鎮爲南山屏障如議行二月楊遇春禽王廷詔於川陝交界鞍子溝禽高天德馬學禮於甯羌龍洞溪三賊皆最悍詔晉二等子復雙眼花翎時賊之著者陝西冉學勝伍懷志湖北徐天德苟文明四川樊人傑冉天泗王士虎等尙不下十餘股四月勦學勝於渭河南岸又蹙之於漢南賊遁平利張天倫糾合五路屯洵陽高嶺劉家河令楊遇春擊走之五月穆克登布禽伍懷志於秦嶺七月遇春禽冉天泗王士虎於通江報曉埡徐天德冉學勝並爲他師所殲而姚之富子馨佐及白號高見奇辛斗等方擾甯羌督諸將進剿迺入川北九月總兵楊芳等禽辛斗於通江十月豐紳桑吉斯爾禽高見奇於達州於是賊首李元受老教首閻天明等各率衆

降賊勢窮蹙條上搜捕事宜詔嘉獎晉封三等伯十一月苟文明合各路殘匪竄陪州裹脅復衆回竄廣元通江十二月敗之於瓦山溪文明竄開縣大甯七年正月斬黃號辛聰於南江文明由西鄉偷渡漢江額勒登保自請罪降一等男詔以川匪責德楞泰勒保等額勒登保兼西安將軍仍專辦陝賊二月文明竄入南山與宋應伏劉永受合督師入山搜剿六月殲其衆於開家灣文明僅以身免劉永明潛遁爲鄉民所殲七月殲文明於甯陝花石巖管一等伯疏陳軍事將竣請撤東三省及直隸兩廣兵遠地鄉勇分別遣留遂窮搜南山餘匪八月禽苟文學斃張芳赴平利與德楞泰會剿楚匪五戰禽斬過半十月斃青號熊方青於達州盡殲竹溪股匪十一月令穆克登布追賊通江鐵鎗臺禽景英蒲添青賴大祥及湖北老教首崔建樂晉三等侯著名匪首率就殲零匪散竄老林十二月疏告藏功詔嘉額勒登保運籌決策悉中機宜躬親行陣與士卒同甘苦厥功最偉晉封一等侯世襲罔替授御前大臣加太子太保賜用紫韁餘論封行賞有差八年春留陝搜捕禽姚馨佐陳文海宋應伏等於紫陽穆

克登布遇伏戰歿六月移師入川禽熊老八趙金友於大甯熊老八即戕穆克登布者疏陳善後事宜各省酌留本省兵勇四川一萬二千湖北一萬陝西一萬五千分布要地隨征鄉勇有業歸籍無業補兵分駐大員統率七月馳奏肅清命暫留四川經理善後編閱陝楚營卡事竣振旅還京十二月至行抱見禮於養心殿獎賚有加命謁裕陵九年春因前遭母憂不獲守制補持服尋命赴四川偕德楞泰殲餘孽十年回京總理行營充方略總裁八月上幸盛京額勒登保以病不克從謁陵禮成特詔加恩晉三等公爵是月卒於京師年五十八上聞震悼回鑾親奠御製述悲詩一章於地安門外建專祠曰褒忠諡忠毅命吉林將軍修其祖墓立碑焉額勒登保初隸海蘭察部下海蘭察謂曰子將才宜略知古兵法以清文三國演義授之由是曉暢戰事天性嚴毅諸將白事莫敢仰視然有功必拊循戰勝親餉酒肉賞巨萬不吝人樂爲用嘗謂諸將曰兵條條生路惟舍命進戰是一死路賊條條死路惟舍命進戰是一生路惟有出其不意攻其不備之一法追賊必窮所向不使休息師行整伍倉卒遇賊即擊

每宿四路偵探臨敵矢石從眉耳過勿動於同列不忌功亦不伐己功尤嚴操
守凱旋過蘆溝橋他將輜重纍纍獨行李蕭然數騎而已歿時子謨齒僅額生
甫數月帝臨奠抱置膝上命襲侯爵尋殤以姪哈郎阿嗣承襲一等威勇侯自
有傳額勒登保不識漢文軍中章奏文牘悉倚胡時顯時顯字行楷江蘇武進
人少困科舉乾隆中侍郎劉秉恬治金川糧餉從司文牘獨勤薦授兵部主事
充軍機章京累遷郎中和珅用事數與抗出爲廣東雷州知府以親老乞留尋
從福康安征苗有功賜花翎洎額勒登保勦教匪從贊軍務剛直無所徇額勒
登保能容之每日跨馬與諸將偕或有逗留輒叱之遇賊務當其衝諸將無敢
却者回營後凡戰地曲折夷險糧運斷續器仗敵壞兵卒勞饑及賊出沒情狀
諸將功過一一言之軍中敬畏時顯與經略等陳奏戰事必以實上嘉經略並
嘉時顯貓兒壩之戰及禽王登廷章奏不欺特賜三品卿銜在軍凡五年累擢
內閣侍讀學士鴻臚寺卿以勞卒於興安軍次贈光祿寺卿賜祭葬

德楞泰字博堂伍彌特氏正黃旗蒙古人乾隆中以前鋒藍翎長從征金川石

峯堡臺灣皆有功累遷參領賜號繼勇巴圖魯五十七年從福康安征廓爾喀冒雨涉險攻克熱索橋賊寨加副都統銜圖形紫光閣尋授副都統遷護軍統領六十年率巴圖魯侍衛從福康安征湖南苗與額勒登保並爲軍鋒福康安旣解松桃永綏圍高宗悅將待以不次之賞於是德楞泰建議深入苗地爲犂庭掃穴計苗酋吳牛生踞大烏草河以抗大兵連克沿河諸寨渡河抵盛華哨苗於山半立木城堅甚斷其汲路火攻克之又克古文坪進攻摩手寨由間道出寨後奪據石城遂偕額勒登保禽牛生授內大臣進攻鴨保山克木城石卡三十餘又克天星寨木城七石堡五禽賊目吳八月嘉慶元年福康安和琳相繼卒於軍先克乾州又從將軍明亮克平隴擢御前侍衛署領侍衛內大臣克險隘養牛塘山梁賊首石柳鄧就殲苗疆略定錫封二等子爵賜雙眼花翎二年命偕明亮移軍四川剿教匪時賊首徐天德王三槐踞重石子香爐坪南曰分水嶺北曰火石嶺賊卡林立進戰奪嶺三槐撲營受創逸五月破重石子明亮亦破香爐坪追殲教首孫士鳳會襄陽賊齊王氏姚之富樊人傑等竄入四

川與徐王二匪合屯開縣南天洞擊破之賊分走雲陽萬縣雲陽教首高名貴欲與天德合以計禽之盡殲其衆於陳家山七月齊王氏等由奉節巫山東走湖北與明亮繞出宜昌迎勦賊南趨留明亮屯宜昌自赴荊州解遠安圍八月賊犯荊門宜城往援之會總督景安以索倫勁騎至合勦大捷二城得全賊欲北竄河南扼要隘斬賊目袁萬相等截回湖北賜紫韁九月殲賊於房縣竹谿竹山賊走陝西平利圍入川東敗之澍河口賊北走紫陽又合白號高均德西走漢中十一月窺渡漢江令副都統烏爾納圖邊突擊於江濱竄入川境三年正月均德復擾陝西褒城與明亮夾擊連敗之於洋縣城固洵陽齊王氏姚之富方竄廣元甯羌山中乘虛由石泉渡漢與均德合東走漢陰詔斥明亮戰不力褫其職嘉德楞泰每戰在前責速勦三月與明亮追齊王二匪由山陽至鄖西日行百七十里連破之於石河甘溝鄉勇遏其前賊無去路踞三岔河左右兩山盡銳圍攻悉殲之齊王氏姚之富投崖死傳首三省均德由鎮安竄維南敗之兩岔河餘賊與李全張天倫合五月又敗之五郎關均德走甯羌廣元合

龍紹周冉文儔踞渠縣大神山有衆二萬詔斥縱賊奪府職留副都統銜七月
偕惠齡恒瑞攻克大神山賊竄營山蹙之黃渡河均德中鎗逸入箕山坪與羅
其清合箕山圍逕百餘里三面陡絕惟東南有路可通徐天德王登廷樊人傑
踞鳳凰寺阻糧道與爲犄角八月克鳳凰寺賊奔箕山負固不下十月分三路
進攻克之其清退踞大鵬寨額勒登保自閬州來會勦十一月賊被攻急乘夜
兩撲營德楞泰偵知之潛伏賊寨南門梯而登火其寨額勒登保等亦襲破西
門殲其清父從國合兵窮追禽其清於巴州方山坪復花翎冉文儔竄東鄉
麻壩乘除夕大破之於通江四年元旦生禽文儔盡殲其衆予一等輕車都尉
經略勒保疏陳諸將惟額勒登保德楞泰尤知兵得士心詔德楞泰專勦徐天
德天德與冷天祿竄涪州冒難民入鶴田寨擊走之又收之於開縣三月天德
自大甯北趨追及於太平又遇龍紹周唐大信等迭擊之賊不得犯陝境旣而
天德入大甯老林與紹周大信及樊人傑龔建卜三聘張天倫辛聰等合率綴
大軍天德建竄太平山等令賽冲阿分兵擊之自擊人傑紹周大信天倫於安

康紫陽連破之驅入川東遂犯湖北七月線號龔文玉亦自夔州至分兵追勦
龔文玉三聘於竹谿加予騎都尉世職八月命額勒登保爲經略德楞額泰爲參
贊赴興山截擊天德退回川東蹕追天倫及聰等入陝十月高均德改名郝以
智率賊萬踞高家營欲由白河窺渡漢紹周及冉天元竄放馬場欲趨紫陽率
賽冲阿溫春回援先破放馬場進攻高家營禽均德檻送京師晉封二等男爵
十一月進兵川北殲白號張金魁於通江禽其黨符曰明等於廣元十二月追
鮮大川苟文明至川東賊瞞大兵俱在川境遂先後竄陝廿五年正月偕額勒
登保分路抵秦州而冉天元糾合徐萬富汪瀛陳得俸張子聰雷世旺衆五萬
遽乘間渡嘉陵江分擾南部西充魁倫不能制詔促德楞額泰回援二月天元踞
江油新店子乃由間道進勦賊分四路迎戰銳甚賽冲阿溫春深入被圍自馳
援夾擊竟日殺傷相當禽得俸斬冉天恒皆悍賊也轉戰連奪險隘三月天元
屯馬蹄岡伏萬人火石埡後德楞額泰令賽冲阿攻包家溝阿哈保攻火石埡溫
春攻龍子觀自率大隊趨馬蹄岡過賊伏數重始覺俄伏起八路來攻人持束

竹溼累禦箭銃鏖鬪三晝夜賊更番迭進數路皆挫敗德楞秦率親兵數十下馬據山巔誓必死天元督衆登山直取德楞秦德楞秦單騎衝賊中堅將士隨之大呼奮擊天元馬中矢蹶禽之賊遂瓦解鄉勇亦自山後至逐北二十餘里禽斬無算天元雄黠冠川賊專用伏以陷官軍至是五日四戰致死決勝負血戰破之羣賊奪氣詔晉三等子是月復大破賊於劍州又破張子聰雷世旺於蓬溪斬世旺晉二等子授成都將軍魁倫以失守潼河逮問起勒保代爲總督與德楞秦合兵勦賊四月賊分擾遂甯安岳逼中江欲趨成都與勒保夾擊連破之邀擊於嘉陵江口俘斬溺斃者數千餘賊渡江爲達州鄉勇所敗禽汪瀛潼河兩岸肅清自此德楞秦威震川中諸將往往假其旗幟賊望見輒走閏四月追賊至達州新甯殲劉君聘苟文富而白號苟文明鮮大川樊人傑等復由陝入川五月移師川北賊走營山渠縣六月敗之恩陽河又與勒保合擊殲苟文禮於岳池七月大川爲民寨誘斬文明遁八月追勦白號賊於東鄉殲湯思舉餘賊與趙麻花王珊合九月與勒保夾擊於雲陽麻花珊先後斃十月湖北

黃白藍線四號賊合犯夔巫龍紹周由太平通江北竄兵至賊去兵去賊至樊人傑冉學勝王士虎遂由川入陝徐天德由陝入楚詔斥德楞泰堵勦不力降一等男十二月李彬楊開第李國謨合窺嘉陵江與勒保合擊連敗之於渠縣安仁河儀隴觀音河斃開第國謨三等子六年正月白號高天升自洵陽偷渡漢江圖竄河南追及於山陽乾溝破之追殲之於野豬坪復一等子二月擊龍紹周於興安逼入川境連敗之於大甯長壩二郎壩紹周竄湖北竹山房縣復敗之走太平復雙眼花翎四月徐天德樊人傑合曾芝秀陳朝觀竄陝西白河分擾民寨遣兵直攻其巢禽朝觀五月大破賊於西鄉天德竄紫陽率賽沖阿溫春燈之仁和新灘大雨水漲天德溺斃紹周乘虛闌入房縣竹谿截擊之復回太平禽其黨陳文明八月追至巫山巴東禽王鵬李天棟九月紹周遁平利令賽沖阿等追殲之晉封二等繼勇伯仍用巴圖魯舊號也十二月苟文明西擾甯羌與額勒登保夾擊賊竄川北大敗之於通江走開縣遣兵追之自率輕騎赴大甯斷其入楚之路七年正月文明復入陝北竄老林至秋乃爲陝軍

所殲川東零匪猶四擾詔德楞泰仍專辦川賊二月破線號餘匪於奉節又破白號張長青於雲陽時樊人傑及崔宗和胡明遠戴仕傑蒲天寶等磨聚湖北境四月率精兵間道抵東湖繞出賊前夾攻雞公山賊巢天寶別屯當陽河五月冒雨進擊天寶負創走又敗之於穆家溝分兵留剿自移師東趨直取人傑冒雨入馬鹿坪山中出賊不意痛殲之人傑竄竹山投水死人傑倡亂最久諸賊聽指揮與冉天元埒至是伏誅晉三等侯七月天寶乘間奪踞興山房縣交界鮑家山死守抗拒以大軍綴其前令總兵色爾滾蒲尙佐率精兵出深箐攻賊巢截其去路禽斬殆盡天寶遁至竹谿墜崖死時巴東興山尙有餘匪皆百戰之餘悉官軍號令及老林路逕屢合圍輒乘霧溜崖突竄分軍遇之則不利大隊趨之則兔脫所餘無幾而三省不能解嚴與額勒登保吳熊光會於竹谿議搜剿額勒登保專任陝境德楞泰專任楚境先後殲戴仕傑趙鑑崔連洛崔宗和陳仕學熊翠諸賊迨十一月捕斬略盡優詔晉封一等侯加太子太保命其子蘇沖阿登珍寶至軍宣慰八年駐巫山大甯捕逸匪曾芝秀冉璠張士虎

趙聰等先後禽殲至冬事竣入覲熱河行在帝大悅御製詩賜之恩賚優渥尋以陝西南山餘孽擾及川境命回鎮成都遣將招降數爲賊害坐降二等侯九年偕額勒登保窮搜老林斬首逆苟文潤餘匪悉平復一等侯十年召授領侍衛內大臣充方略館總裁總理行營事務管理兵部十一年甯陝鎮新兵陳達順東先倫等作亂命馳往勦治叛將蒲大芳等乞降縛獻達順等磔之大芳等遣成回登議以降衆歸伍詔斥寬縱奪職尋授西安將軍十三年勦定瓦石坪叛匪十四年晉三等公尋卒樞至京師帝親製詩輓之諡壯果詔四川建立專祠入祀京師昭忠祠德楞泰英勇超倫戰必身先陷陣名與額勒登保相亞馬蹄岡之戰轉敗爲勝時稱奇績既卒奉詔褒卹特舉是役保陞川西數十萬生靈厥功最偉在軍俘獲必詳訊省釋未嘗妄殺良民婦女保全甚衆蜀民尤感頌焉子蘇沖阿一品蔭生授侍衛每德楞泰戰勝輒擢其官累遷至盛京副都統署黑龍江將軍襲一等侯孫倭什訥杭州將軍曾孫希元吉林將軍並嗣爵次孫花沙納官至吏部尙書自有傳

論曰仁宗親政以三省久未定卜於宮中繇曰三人同心乃奏膚功後事平叙勞額勒登保第一德楞泰次之勒保又次之論戰績勒保未足與二人比然當德楞泰偕明亮由楚入陝見民苦虜掠陳堅壁清野策廷議以築堡重勞未之許也勒保至四川始力行之推之三省賊竟由是破滅三人者相得益彰未容有所優劣勒保寬能容衆額勒登保忠廉忘私德楞泰仁及俘虜賊量並有過人爲國方召延世侯封豈偶然哉

清史稿

列傳一百三十二

永保

惠齡

宜綏

子期滿通阿

英善

福甯

景安

秦承恩

永保費莫氏滿洲鑲紅旗人勒保之弟也以官學生考授內閣中書充軍機章京遷侍讀乾隆三十七年父溫福征金川永保齎送定邊將軍印遂隨軍明年溫福戰歿木果木永保冒矢石奪回父尸襲輕車都尉遷吏部郎中泊金川平追論木果木之敗咎在溫福奪世職仍留永保原官出爲直隸口北道歷霸昌清河兩道遷布政使調江蘇四十九年擢貴州巡撫歷江西陝西五十一年署陝甘總督尋授塔爾巴哈台參贊大臣五十六年哈薩克汗韃里素勒坦遣子入覲詔嘉永保撫綏有方授內大臣賞雙眼花翎五十八年調喀什噶爾參贊大臣授戶部侍郎留駐新疆六十年調烏魯木齊都統嘉慶元年春湖北教匪

起永保奉詔入京行抵西安命偕將軍恒瑞率駐防兵二千調陝西廣西山東兵五千會剿三月至湖北總督畢沅疏陳各路勦殺不下數萬而賊起益熾詔分專責成永保恒瑞任竹山保康一路畢沅舒亮任當陽遠安東湖一路惠齡富志那任枝江一路鄂輝任襄陽穀城均州光化一路孫士毅任西陽來鳳一路永保偕恒瑞復竹山進房縣禽賊首祁中耀餘賊遁保康白雲寺山復敗之禽賊目曾世興等永保疏言襄陽賊數萬最猖獗賊首姚之富齊王氏劉之協皆在其中爲四方諸賊領袖破之則流賊自瓦解宜俟諸軍大集合力分攻帝聽之五月永保等馳赴襄陽自樊城進取鄧桃湖會軍呂堰賊退屯雙溝分軍五路夾擊殲賊二千餘賊分竄孝感感距漢陽百餘里幸爲潦阻武昌戒嚴時畢沅圍當陽數月不下惠齡勦枝江賊亦無功詔命永保總統湖北諸軍先靖襄陽而後分攻孝感當陽兩路參將傅成明等擊孝感賊遇伏敗歿永保令明亮馳救復請調苗疆防兵助剿六月永保渡滾河破梁家岡張家壩賊營二十餘座賊竄棗陽潛踞隨州之梓山青潭連破之復偕恒瑞慶成破賊於紅土山禽

賊渠黃玉貴於是襄陽呂堰進東百數十里及棗陽隨州宜城無賊氛孝威之賊亦爲明亮所殲詔嘉永保調度協宜加太子太保先是命署湖廣總督及畢沅復當陽永保請寢前命允之八月移勦鍾祥明亮以師來會賊自溫河口至千弓壩依山結營互數十里永保率大軍由西北進擊繪圖陳奏帝方以東南空虛慮賊逃竄適明亮疏言鍾祥爲賊巢穴宜四面夾攻以防漏網今永保以九千餘兵由西北追壓而東南要截之兵僅三千餘地闊兵單難杜竄逸帝以永保擁衆自衛切責之明亮敗賊土門冲永保不能夾擊賊轉而北永保偕明亮追至襄陽雙溝賊分兩路竄河南東由棗陽趨唐縣西由呂堰趨鄧州官軍蹙西路敗諸呂堰獲姚之富母媳及孫而東路賊已入唐縣潯沱鎮疏言追賊經月兵力疲憊難以痛殲請增兵助勦詔斥其無能調山東直隸兵四千復簡健銳火器營各軍赴之十一月新兵既至攻破唐縣賊屯十一姚之富已遁犯棗陽復渡滾河而西蹂呂堰向光化穀城圍景安於鄧州魏家集越二日援兵始至帝怒永保擁勁旅萬餘徒尾追不迎擊致賊東西橫瞞無忌褻職逮京下

獄籍其家並褫其子侍衛甯志甯怡職發往熱河三年以兄勅保禽川賊王三槐功推恩宥釋勅保請將永保發軍營效力不許四年勅保爲經略大臣予永保監翎侍衛齋經略印赴軍尋擢頭等侍衛署陝西巡撫與明亮會勦張漢潮於終南華林山中遇伏敗績復與明亮不協互攻許詔逮問併坐在湖北勦用軍需受饋遺事論大辟詔原之免罪予八品領催自備資斧赴烏里雅蘇台辦事六年充參贊大臣七年授雲南巡撫八年威遠思茅獠匪擾邊永保赴普洱偕提督烏士經進討肇亂土弁刁永和聞風遁威遠獠匪亦退禽思茅獠酋扎安波賽閔餘匪奔逸南興土司張輔國屢與孟連土司爭界構釁至是勘定之永保疏陳善後事內地雜居夷人不法按律懲治土司夷境滋事但遣兵防範不使內竄詔嘉得大體弭邊釁賞花翎十三年兼署貴州巡撫調廣東尋擢兩廣總督未至卒於途贈內大臣詔念前勞曾籍沒家無餘資賜銀千兩治喪諡恪敏孫文慶咸豐中官大學士自有傳

惠齡字椿亭薩爾克圖氏蒙古正白旗人父納延泰乾隆中官理藩院尙書軍

機大臣加太子少保因喀爾喀台吉沁爾多濟規避軍事不効奏罷職復起用
終於理藩院侍郎惠齡由繙譯官補戶部筆帖式充軍機章京累遷員外郎緣
事奪職起戶部主事仍直軍機乾隆四十年予副都統銜充西甯辦事大臣調
伊犁領隊大臣擢工部侍郎調吏部充塔爾巴哈台參贊大臣五十年回京署
正黃旗滿洲副都統授湖北巡撫調山東五十六年擢四川總督征廓爾喀命
爲參贊赴西藏會勦督治糧運事平圖形紫光閣列前十五功臣中五十八年
授山東巡撫調湖北再調安徽六十年授戶部侍郎苗疆用兵留署湖北巡撫
治糧餉嘉慶元年正月教匪苗傑人張正謨等倡亂於枝江宜都率師往勦總
兵富志那禽首逆苗傑人而襄鄖宜施諸郡賊並起命惠齡專勦枝江宜都一
路自春徂夏無功以大兩爲解嚴詔切責八月克灌腦灣賊寨禽張正謨等加
太子少保署工部尙書予二等輕車都尉世職進攻涼山搗其巢禽首逆覃士
潮宜都枝江悉平移軍長陽黃柏山會勦十一月襄陽賊姚之富自黃龍壩偷
渡滾河竄河南黜總統永保以惠齡代之馳赴襄陽疏言襄鄖平衍無險可扼

賊習地勢必不自趨絕地惟有嚴防漢江潛渡並堰唐河白河移難民於河西守岸團練以蹙賊會之富折回湖北境惠齡迎擊遇其西軼敗之茅茨畝分兵五路兜剿二年二月敗賊於鮑家畝禽賊首劉起榮復敗賊於曾家店鏖戰於鄭家河殲獲甚衆實雙眼花翎擢理藩院尙書兼鑲白旗蒙古都統惠齡偕恒瑞慶成勦襄陽賊屢破之餘衆僅數千勢甚蹙分路竄河南境官軍疲於尾追不易得一戰先後並入陝西遂復猖獗五月李全王廷詔姚之富合爲一路由紫陽白馬石竄渡漢江後五日惠齡始至奪宮衙世職花翎易宜縣總統軍務降惠齡爲領隊聽節制賊旣分竄入川十月王廷詔高均德復北犯窺渡漢江惠齡邀擊敗之斬賊二千詔嘉其僅兵二千當賊二萬以少繫衆復雙眼花翎十一月齊王氏張漢潮姚之富高均德合入漢中南山自黃官嶺至新集連營二十里欲渡漢惠齡軍北岸蹙其半濟賊走甯羌追敗之折竄漢中因移兵扼漢南賊不得北竄復分道入川惠齡繞由西鄉太平赴大甯夔州兜剿時川匪王三槐徐天德竄梁山羅其清冉文儒分屯營山儀隴三年陝襄諸賊在川境

者俱會於文儒而三槐天德自太平走與合勢張甚詔總統勒保會諸將分路進勦惠齡與德楞泰爲一路夾攻羅冉二賊五月擊文儒於儀隴其清及阮正通先後來援皆敗之賊屯大神山連營數十里六月與德楞泰合攻破之斬賊甚衆文儒走箕山龍鳳坪與其清相犄角阮正通等又與台帝以首逆稽誅屢詔嚴責於是德楞泰破賊箕山其清奔天鵬寨惠齡分路進攻十二月其清就禽檻送京師四年正月文儒就禽予一等輕車都尉世職丁母憂會其清讞詞稱惠齡一軍較弱帝斥其爲賊所輕命回京守制降兵部侍郎尋授山東巡撫六年擢陝甘總督專勦南山餘匪復以勦賊遲緩降二品頂戴七年教匪平復頭品頂戴花翎九年卒贈太子少保封二等男諡勤襄子桂斌官和闐幫辦大臣

宜縣初名尙安鄂濟氏滿洲正白旗人由兵部筆帖式充軍機章京累遷員外郎從征金川進郎中乾隆四十三年出爲直隸口北道擢陝西布政使四十七年擢廣東巡撫以鹽商沈冀川獄贖徇褫職戍新疆尋予四品銜充吐魯番領

隊大臣石峯堡回亂駐守平涼歷庫車喀什噶爾辦事大臣烏魯木齊都統五十九年入覲道經固關值水災飭官吏賑撫高宗嘉之命改名宜縣六十年授陝甘總督嘉慶元年教匪起湖北陝西戒嚴宜縣駐軍商州令副將百祥勦鄖陽鄖西賊克孤山大寨賊首王全禮伏誅漢江以北安堵加太子太保賞雙眼花翎甘肅歲稔命宜縣回蘭州賑撫是年冬四川教匪起由太平入陝境擾安康平利紫陽諸縣宜縣督軍馳勦賊逼興安分踞城南安嶺城北將軍山進攻克之禽其渠王可秀馮得士等復殲漢江北岸大小米溪賊偕提督柯藩總兵索曾英阿移攻漢南洞河汝河諸賊賊併五雲寨乘雪夜火其寨殲賊甚衆詔宜縣進勦達州二年春攻太平賊於通天觀高家寨南津關連敗之川匪最悍者達州徐天德東鄉王三槐冷天祿巴州羅其清通江冉文燾天德三槐等合陷東鄉踞張家觀其清踞方山坪文燾王家寨圖據周家河梗運道且乘間與張家觀合宜縣遣兵攻王家寨分襲張家觀自率隊夜焚曾家山賊柵天德分援兩路遂乘虛下張家觀復東鄉餘賊奔清溪塲金峨寺據險抗拒四月官

軍分五路進克之天德等竄重石子香爐坪將與巴州賊合宜縣潛攻王家寨賊走方山坪天德來援敗之知縣劉清素得民心令招諭諸賊三槐率衆詭降陰圖襲營宜縣覺其詐設伏擊退五月達州賊傾巢出犯有備不得逞宜縣駐軍大成寨遣將襲三槐於毛坪三槐中槍跳免時襄賊由漢江北渡入陝署總督陸有仁以罪逮乃調英善督陝陝甘黜惠齡總統命宜縣代之兼攝四川總督於是令明亮攻重石子德楞泰與鄉勇羅思舉夾擊敗之分二路竄追殲孫士鳳於糜子壩士鳳爲四川教首三槐等皆其徒也至是爲德楞泰所誅餘賊西走徐家山乘霧夜遁其方山坪賊爲百祥所截舒亮圍賊林亮工於巴州白崖山觀成劉君輔破大甯賊圍之於老木園川賊漸蹙而襄陽賊李全王廷詔姚之富等由陝分道入川與之響應勢復熾雲陽賊伏陳家山與襄賊約犯官軍爲羅思舉所殲李全等踞開縣南天洞火焰壩旋奔雲安場開萬諸匪應之謀犯夔州附近賊遽起詔責宜縣專勦七月駐軍寶山關開縣東鄉交界地也川賊分立名號羅其清稱白號冉文傳稱藍號踞方山坪王三槐稱白號徐天

德稱青號踞尖山坪劉清率鄉勇與百祥朱射斗會勦方山坪賊潰圍竄通江巴州與天德合既而天德等竄青杠渡圍巴州其清文偉欲從儀隴南部分犯保甯奪官軍饒道百祥扼其前退走黃渡河旁掠儀隴宜縣扼之官渡口三槐等竄集縣其清文偉走巴州三槐復分攻鄰水陷長壽東趨重慶時齊王氏姚之富已竄湖北李全高均德先後分竄陝西宜縣疏言惠齡恒瑞明亮德楞泰皆入陝惟臣一人在川諸賊齊擾川東北運道嘉陵江防孔亟欲親赴保甯則川東千里無人調度請別簡總督治理地方而已親督師專一辦賊帝亦以宜縣年老十月命勒保總統軍務宜縣以總督兼理軍需又疏言軍興以來四川調兵一萬九千有奇陝甘合調二萬有奇兩湖更無餘兵可調各省募補者難備攻勦州縣團勇各衛村莊尤難責其長驅赴敵目前賊勢明亮德楞泰至襄陽則鄭賊竄興安宜昌賊回夔巫況雲陽奉節伏莽尙多兵力日分日薄請敕添練備戰之兵四川陝甘湖北各五千至隨營鄉勇費與兵等賞過則驕威過則散究非紀律之師不若選充營伍賊平即補營額費不虛糜而驍悍有所約

東詔行之三年春調勒保四川總督宜縣回任陝甘駐陝境辦賊未幾高均德齊王氏竄漢陰禡明亮職命宜縣赴軍督勦而齊王氏姚之富已爲德楞泰明亮所殲阮正通張漢潮先後犯陝境川賊劉成棟走與合宜縣自鎮安分路截勦漢潮折向通江巴州正通竄城固李全與高均德合屯五郎鎮安山陽間宜縣偕明亮要之維南鑒戰兩河口均德竄秦嶺正通折入川五月賊分股北出鳳縣掠兩當闌入甘境詔斥宜縣疏防旣而明亮敗賊於略陽成棟漢潮復由竹谿竄平利命宜縣與額勒登保爲一路專勦平利之賊尋敗之於孟石嶺賊遁入川責宜縣嚴遏回竄八月徐天德冉文偉高均德由儀隴竄廣元漢潮北入南江欲還湖北官軍蹙之上游不得渡宜縣檄兵扼甯羌沔縣漢潮竄太平於是川楚匪多流入陝境其魁樊人傑龍紹周李樹阮正灘各擁衆數千迭擾安康平利紫陽諸縣四年漢潮竄五郎詔斥宜縣畏葸避賊命解任來京在散秩大臣上行走旣至復斥其辨飾降三等侍衛赴烏里雅蘇臺辦事五年追論軍需冒濫禡職遣戍伊犁罰銀二萬兩助餉逾兩年釋回及三省教匪平以員

外郎用後帝閱方略宜縣曾論鄉勇切中時弊追念前勞擢大理寺卿病免十七年卒子瑚素通阿初名瑚圖靈阿乾隆五十二年進士由刑部員外郎改翰林院侍講累遷左副都御史嘉慶初疏陳關稅鹽課積弊又請却貢獻停捐納居官有聲擢盛京刑部侍郎宜縣遣戍瑚素通阿以父老請代行未允在盛京劾將軍琳甯寬縱番役及私役官吏分肥事侍郎資源查辦不實資源琳甯並黜罷內調刑部侍郎赴河南讞獄漏洩密封筆帖式後起用終刑部侍郎

英善哈爾察氏滿洲鑲藍旗人由親軍補侍衛處筆帖式累遷刑部郎中改御史除甘肅蘭州道以親老留京職乾隆五十年出爲直隸按察使遷湖南布政使調江蘇丁母憂歸命署廣西布政使調補四川五十六年護理總督尋擢貴州巡撫調湖北以治西藏軍需未之任嘉慶元年調廣東旋召授刑部侍郎而四川教匪起仍留攝總督初四川自金川木果木之敗逃兵與失業夫役無賴游民散匿剽掠號爲囑匪官捕急則入白蓮教爲逋逃數及湖北襄陽敗匪竄入川一旦揭竿戰鬪如素習至是達州奸民徐天德等激於胥役之虐與太平

東鄉賊王三槐冷天祿等並起英善率兵五百馳勦復調成都駐防兵副都統勒禮善佛住率以往連破賊巢禽賊目何三元等賊竄橫山子據險負隅遣總兵袁國璜何元卿分路進攻戰三日國璜元卿並歿於陣尋克馬鞍山賊寨禽賊首徐天富而王三槐徐天德等合陷東鄉佛住戰死賊熾兵單詔責英善固守毋輕進命宜縣赴達州督師二年二月宜縣至英善連破賊於貫子山羅江口通周家河連路偕宜縣克張家觀復東鄉五月命赴甘肅攝總督王三槐等由通江巴州分犯保甯英善赴慶元迎勦偕總兵富爾賽朱射斗擊之於儀隴閬中多所斬獲賊逼蒼溪設伏敗之遂遁三年命與福甯赴達州治四川糧運四年調兵部侍郎充駐藏大臣調吏部駐藏如故五年帝以教匪久未平追論始事諸臣玩寇褫職以四品頂戴仍留駐藏七年召授頭等侍衛擢刑部侍郎遷左都御史兼正黃旗漢軍都統十一年以駐藏時於福甯私挪庫款徇隱未舉降太常寺卿十四年卒

福甯伊爾根覺羅氏初隸貝子永固包衣由兵部筆帖式洊擢工部郎中乾隆

三十三年出爲甘肅平慶道累遷陝西布政使五十五年擢湖北巡撫拾入鑲藍旗滿洲調山東治衛河運務稱旨五十九年漳衛二河溢疏消積水撫恤災黎曹單漫水下流爲壘碣壩堰所阻馳往會勘酌開壩堰以洩水並協機宜調河南尋擢湖廣總督駐襄陽捕治教匪獲首逆宋之清等實諸法六十年調兩江會黔苗石柳鄧勾結楚苗石三保焚掠辰州命留湖北會勦福甯至鎮寧防後路嘉慶元年湖北教匪攻來鳳甚急福甯馳抵龍山擊敗之賊屯旗鼓寨偕四川總督孫士毅合勦士毅卒於軍福甯代之偕將軍觀成總兵諸神保進攻破其寨禽賊首胡正中餘衆窮促乞降誘入龍山城駢誅二千餘人以臨陣殲戮奏加太子少保移軍勦林之華覃加耀於長陽巴東賊竄黃柏山偕觀成惠齡會勦未下惠齡赴襄陽觀成入川二年命額勒登保移師黃柏山福甯以兵隸之地形天險固攻數月賊竄鶴峰芭葉山繼竄大境口又竄建始宣恩十一月始殲之華於長陽加耀遁歸州以勦賊不力奪宮銜三年禽加耀於終報案帝猶斥諸將遷延貽誤福甯有地方之責咎尤重褫職罰銀四萬兩充餼予副

都統銜偕英善駐達州治四川軍需四年英善調駐西藏福甯遂專任其事時軍營支用冒濫統兵大員奢糜無度兵勇口糧反多遲延幾致枵腹四川餽數更多於湖北數倍屢詔訓戒福甯不能綜覈以奏報浮泛被詰又奏賊數有增無減勅保疏辨命魁倫赴達州察視覆陳賊數實減而大股分爲小股賊名反多得福甯理饒含混狀詔褫副都統銜留達州候命尋以旗鼓樂殺降事覺帝方以勦撫責諸路而川賊高均德被禽言賊黨恐投降仍遭誅戮故多觀望詔斥福甯此舉失人心而傷天理逮治論罪遣戍新疆尋原之命赴額勒登保軍前効力會賊竄渡嘉陵江由於福甯裁撤鄉勇所致仍戍伊犁五年予三等侍衛赴西藏辦事九年召還授正白旗蒙古都統十一年以三品銜休致十九年追論在西藏擅借庫帑及湖廣任內濫用軍需久不完繳下獄尋卒

景安鈕祜祿氏滿洲鑲紅旗人和珅族孫也由官學生授內閣中書游擢戶部郎中出爲山西河東道累遷甘肅河南按察使河南山西甘肅布政使乾隆五十六年征廓爾喀命治西甯至藏臺站留藏督餉連事平以親老歸未幾擢工

布侍郎歷倉場戶部六十年授河南巡撫嘉慶元年湖北教匪北犯景安駐軍南陽以籌濟恒瑞軍餉加太子少保十二月姚之富犯鄧州圍景安於魏家集恒瑞援至始解二年浙川教匪王佐臣謀應賊布政使完顏岱捕斬之景安欲攘功躡兵戮難民以捷聞賞雙眼花翎封三等伯時襄陽賊屢爲惠齡慶成等所破窺北面可乘遂分三路犯河南王廷詔出北路竄葉縣焚保安驛圍官軍於裕州總兵王文雄兵至乃引去景安尾追至南召聞桐柏有警馳回防禦李全出西路竄信陽確山羅山浙川趨盧氏出武關慶成追之姚之富齊王氏出中路竄南陽掠嵩縣山陽惠齡追之賊入河南後虜脅日衆不迎戰不走平原忽合忽分以牽兵勢先後並入陝西復合景安頓兵內鄉賊入陝後二十餘日始追至盧氏賊尤輕之號爲迎送伯三年春擢湖廣總督四月率師次荊門州劉成棟來犯與布政使高杞分路擊走之六月賊由竹谿竄入陝詔切實四年張漢潮擾陝西五郎洋縣景安屯鄜陽遣總兵王凱扼鄜西漢潮已分路自安康折竄鎮安景安疏稱赴鄜西迎勦詔斥其不實時仁宗初親政以景安堵勦

不力撫治失當解職命治四川軍需尋奪伯爵戍伊犁是年冬帝召見惠齡論其愜怯縱寇及浙川冒功事逮京讞擬大辟緩刑禁錮七年教匪平得釋發熱河充披甲逾年宥還以六部筆帖式用効力河南河工衡家樓工竣晉秩員外郎授直隸承德知府擢山西按察使陝西布政使十一年授江西巡撫調湖南召爲內閣學士累遷戶部尙書加太子少保二十五年授領侍衛內大臣守護昌陵二十七年休致尋卒景安初附和坤憐於軍事然居官廉當其逮京值朱珪入見帝曰景安至矣軍事久不定欲去一人以警衆如何珪曰臣聞景安不要錢帝曰若乃知操守耶竟以是獲免後復用之

秦承恩字芝軒江蘇江甯人乾隆二十六年進士選庶吉士授編修擢侍講出爲江西廣饒九南道累遷直隸布政使五十四年擢陝西巡撫嘉慶元年教匪起荆襄承恩率師赴興安籌防至冬四川達州教匪自太平入陝犯興安承恩偕總督宜縣迭擊敗之十二月會勦洞河汝河諸賊二年正月擊安康賊於光頭山首逆劉王氏伏誅陝境略平宜縣進勦川匪承恩專任陝防三月襄匪由

河南盧氏竄商南勾結陝匪紛起應之承恩移軍商州偕恒瑞殲山陽西牛槽賊雒南石板溝奸民起總兵富爾賽捕斬之姚之富由商州犯孝義窺西安承恩扼之於秦嶺惠齡等追擊賊走鎮安與李全王廷詔合掠洵陽安康時陝西兵力僅有鄉勇萬餘人提督柯藩守興安府城兵止二百無力攻勦惠齡恒瑞合擊賊於黃龍鋪賊分竄復合六月由漢陰至紫陽渡漢江詔斥承恩疏防奪翎頂賊走漢南與川匪合八月復入陝竄白河石槽溝承恩率鄉勇扼安康要隘賊分路來犯禦之於平利金堂寺既而賊逼興安偕惠齡擊走之以功復翎頂三年春丁母憂軍事方亟奪情視事二月高均德齊王氏合竄漢陰觀音河糾李全王廷詔分道由城固南鄭北出寶雞合攻郿縣掠盤屋將犯西安承恩懼率師回防總兵王文雄力戰敗賊於焦家嶺圪子村大創之賊復分竄三月文雄復破李全餘衆於翔峪澧峪四月李全糾阮正通折回鎮安西擾漢陰石泉高均德踰秦嶺走老林承恩與文雄扼子午峪既而均德全與徐天倫合爲一路正通由石泉洋縣西竄均德等尋竄入川承恩進兵漢中八月川匪徐

天德冉文儔樊人傑襲匪張漢潮先後並入陝境承恩師久無功四年命解職回籍守制會勦張漢潮於鳳翔承恩遣游擊蘇維龍扼東路戰失利漢潮突圍遁襪承恩職逮京論大辟詔以承恩書生未嫻軍事宥歸尋遣戍伊犁七年釋還起主事纂修會典出爲直隸通永道擢江西巡撫遷左都御史仍署巡撫事十一年召授工部尙書調刑部署直隸總督十三年以治宗室敏學獄瞻徇降編修効力文穎館遷司經局洗馬晉秩三品卿十四年卒

論曰方教匪之初起也苗疆軍事未戡楚蜀空虛草澤么虺燎原莫制永保惠齡號曰總統局於襄陽一隅景安秦承恩不諳軍旅賊遂蹈瑕蔓延豫陝宜縣受事僅顧蜀疆及勁兵移陝束手求退矣英善福甯並皆庸材三年之中防勦無要領如治絲而益紛仁宗親政赫然震怒諸臣相繼罷譴士氣一新事機乃轉廟堂戰勝固有其本哉